



**MALO O SAMOA**

**SAUNOAGA O LE TALA FAATATAU AUTU O LE TUPE**

**2010/2011**

**SUSUGA NIKO LEE HANG**

**MINISITA O TUPE**

**28 Me 2010**

## Fua Faasolo o Mataupu

I.	FAAVAE O LE TALA O LE TUPE.....	1
II.	ATINAE O LE LIMA TAUSAGA UA MAVAE.....	2
(i)	Tulaga o le Tamaoaiga .....	2
(ii)	Aoaoga .....	2
(iii)	Soifua Maloloina.....	3
(iv)	Faatoaga.....	3
(v)	Atinae Tetele.....	4
	1. Felauaiga i le Laualeele.....	4
	2. Suvai ma Vai Lafoa'i.....	4
	3. Eletise.....	5
	4. Fesootaiga .....	5
	5. Uafu ma Taulaga.....	5
	6. Malae vaalele .....	6
(vi)	Atinae o Turisi.....	6
(vii)	Atinae o Pisinisi.....	7
	1. Atinaega o le Vaega o Tupe .....	7
	2. Fefaatauaiga.....	7
(viii)	Atinae o Taaloga.....	7
III.	TAIALA O LE TALA O LE TUPE .....	8
IV.	OTOOTOGA O LE TALA FAATATAU O LE TUPE .....	9
V.	FAAVAE O TUPE MAUA .....	9
VI.	ATINA'E FAAMUAMUA.....	10
VII.	TUPE FAAALU LĒ FUAFUAINA .....	14
VIII.	TALA OLE TUPE FAAOPOPO LONA LUA 2009/2010.....	14
IX.	FUAFUAGA TU'UTU'U MAMAO .....	14
X.	AUIVI MO FUA FAATATAU O GALUEGA FAATINO.....	15
XI.	UPU FAAI'U .....	15
XII.	PEPA FAAOPOPO: FAAMATALAGA O TUPE A LE MALO O TAUSAGA LUMANAI 2010/2011 – 2012/2013.....	157

## **SAUNOAGA O LE TALA FAATATAU AUTU O LE TUPE 2010/2011**

Lau afioga i le Fofoga Fetalai,

E tusa ai ma le vaega 124 o le Tulafono Tumau, e ia te au le ava ma le faaaloalo, e fai ai a'u ma sui o le Malo, ou te tuuina atu ai se ootoga o faamatalaga o le Tala Faatatau o le Tupe mo le tausaga 2010/11 i luma o le laulauāfono a le Palemene.

### **I. FAVAE O LE TALA O LE TUPE**

Lau afioga i le Fofoga Fetalai ma Sui Mamalu o le Maota

O se tausaga faagalo gatā le tausaga faaletupe o loo faagasolo nei, ona o le galu lolo na maumau ai soifua, ma faaleagaina ai mea totino. E toa 143 na maumau soifua, ae lata i le 5,300 na leai ni fale e nonofo ai. E fa'i o soifua maumau, a o le tau o mea na faaleagaina, e sili atu ma le 15% o le tuu aofa'i o le tamaoaiga. O lenei foi faalavelave, ua vae manua ai taumafaiga a Samoa ina ia vave ona fo'ia aafiaga o le faaletonu o le tamaoaiga o le lalolagi, lea na aafia tele ai le vaega o tagata tafafao maimoa mai fafo.

O le tausaga foi lenei na vaaia ai le siita'i o tupe faaalu e oo atu i le 11% ole aofaiga o le tamaoaiga, ina ia vave ona toe siitia le tamaoaiga o Samoalea na aafia i le faaletonu ole tamaoaiga o le lalolagi. O nei faaletonu na mafua ai ona pa'ū lo tatou tamaoaiga i le -3.2% i le tausaga 2008, ma toe pa'ū foi i le -1.8% i le 2009, i le tuana'i ai o le tulaga lelei i le sefulu tausaga ao lei oo mai i le 2008.

Na toe faaopoopo le isi mamafatū ina ua afatia Samoa e le galulolo. Ae peita'i, se mea manū le tali mai o a tatou paaga mai fafo ile faatupeina o galuega toe faaleleia. O le isi itu tāua, o le vave o le tali mai, ua faaitiitia ai le tatou faamoemoe i ā tatou lava seleni, toe lava ai foi a tatou tupe mai fafo e avagalima a'i oloa moomia mo le toe faaleleia o mea na faaleagaina.

E iai le manatu o le a toe tulaga lelei mai le tatou tamaoaiga i se taimi vave, auā o lea ua amata galuega tetele mo le faaleleia o mea na faaleagaina, faatasi ai ma le toe una'ia o le atina'e mo tagata tafafao mai fafo. E ono iai se siitaga i le tatou tamaoaiga i le amataga o le tausaga faaletupe fou ma faasolo atu ai i le lumanai.

E ui i vaaiga lelei ua maitauina, ae ao lava ona tatou manatua le faigofie ona osofaia lo tatou tamaoaiga i faaletonu e ono toe tutupu mai i le lalolagi. E tatau ai ona tatou mataāla ma faatulaga lelei auala talafeagai, e puipuia mai ai si o tatou atunuu mai ni faigatā e toe oo mai, ina ia saga faamausalī ai lo tatou tamaoaiga.

O le ata lea o loo faatulaga a'i le tala faatatau o le tupe mo le 2010/11. E moni e ma'ale'ale si o tatou tamaoaiga, ae o le a faaaauu pea ona siitia a tatou tupe faaalu, ina ia una'ia ai le tamaoaiga, faatasi ai ma le toe faatino o galuega toe faaleleia mo le tsunami.

## **II. ATINAE O LE LIMA TAUSAGA UA MAVAE**

Lau afioga i le Fofoga Fetalai ma le mamalu o le maota,

O le a ou oto'otoina atu nisi o atina'e sa mafai ona ausia i le paeaiga lenei, ina ia ausia ai le atina'e manuia o tatou tagata:

### **(i) Tulaga o le Tamaoaiga**

Na mafai ona ausia le siitia i le 4% i le tausaga o le tatou tamaoaiga mo le sefulu tausaga i luma atu o le tausaga 2008, ina ua tulai mai le faaletonu o le tamaoaiga o le lalolagi, ma aafia ai atunuu uma. O faaletonu nei, ua aafia ai fua Samoa ae mafua mai atunuu i fafo. A o le tali a le tatou Malo i lenei faaletonu, ua faataoto ai se polokalame e toe una'ia ai le atina'ega o le tamaoaiga. Ua toe faaopoopo mai ma le tsunami, ma ua atili ai ona tuai le toe una'iga o ā tatou atina'e, ona o le ogaoga o faafitauli na pagatia ai si o tatou atunuu.

Ae ui i nei faaletonu, na mafai lava e le Malo ona pulea lelei le tamaoaiga, ma e telē le avanoa e toe foi ai i le lelei le tamaoaiga i le tausaga fou. Ua faa-iloa mai ai, sa mafai lava e le Malo ona faatautaia lona tamaoaiga i le lima tausaga ua tuana'i. E ui lava ina oo mai taimi faigata, ae na mafai lava e le Malo ona toe faafoi mai le tamaoaiga i se tulaga lelei, mo le manuia o ona tagata.

### **(ii) Aoaoga**

Sa ave pea le faamuamua a le Malo i vaega tetele nei, mo le soifua manuia ma le a'oa'oina o le tatou atunuu. Ou te fiafia ai e faailoa atu vaega nei na mafai ona ausia e le vaega o aoaoga:

1. Ua faavaeina nei le Pulega o Faailoga ma Tusi Pasi Taualoa, mo le faaleleia o tulaga o aoaoga i luga atu o aoga mauualuluga.
2. O le tausaga e 2006 na tuufaatasia ai le Iunivesite Aoao o Samoa, ma le Aoga Faapitoa mo Matata Esee, mo le faaleleia lava o le auunaga. O le 2007 foi na amata ai le Aoga Faapitoa a Ausetalia mo le Pasefika, ma ua agavaa ai o tatou tamaiti i ni tusi pasi e aloa'ia i totonu o Ausetalia.
3. E silia ma le 30 aoga tulaga lua na fausia ni faleaoga fou, i fesoasoani mai Iapani, Saina, ma le Iuni o Malo Europa, faatasi ai ma le fesoasoani a le Malo Ausetalia e faamealofa ai kesi ma nofoa, o tusi aoga ma pā esi'o ai faleaoga. Na ave foi le faamuamua i afioaga na aupito i mafatia i le galu lolo i le tausaga ua mavae, e pei ona iai le aoga maualuga a Falealili lea ua amata fausia ma e faamaeaina i le amataga o le tausaga fou.
4. Ou te fiafia foi e faailoa atu, o le tausaga na te'a nei na tatala aloa'ia ai se taavale faapitoa mo aoaoga tau komipiuta, e tali atu ai i le televave o le ofi mai o lenei tomai faapitoa. O lenei taavale, e ono komipiuta o iai, faatasi ai ma se masini lolomi, o se TV ma totoga uma e moomia mo lenei faamoemoe.

### **(iii) Soifua Maloloina**

Sa faaaauau foi atina'e i le vaega o le soifua maloloina, e aofia ai vaega nei:

1. O le 2006 na tuueseeseina ai le Matagaluega o le Soifua Maloloina ma le Pulega o Tautua Faa-Soifua Maloloina. Ua feagai nei le Matagaluega ma fuafuaga mamao, ma le faatonutonuina o le vaega o le soifua maloloina, a o le Pulega ua feagai nei ma le faagaioiga o maota gasegase uma i totonu o le atunuu.
2. O isi tulafono tau le soifua maloloina ua pasia nei, e aofia ai le tulafono faatonutonu mo tapaa, o le tulafono mo gasegase o le mafaufau, tulafono mo tausima'i ma faatosaga, tulafono mo le resitaraina ma le faatulagaga o tomami faafoma'i, tulafono mo fale tala vai, tulafono mo le au fa'i nifo, ma le tulafono mo foma'i galulue.
3. Ua mae'a nei ona toe faaleleia totoga moomia mo togafitiga i le maota gasegase i Motootua i se fesoasoani mai le Faletupe o le Lalolagi. Ua mae'a faapipii se faata faapitoa na faamealofa mai le Malo Saina. Ua mae'a foi ona toe faafou le maota gasegase i Tuasivi i le fesoasoani mai o le Malo Iapani. Ua mae'a ona toe faatotoga maota gasegase faaitumalo o Poutasi, Lalomanu ma Safotu mai se fesoasoani mai le Faletupe o le Lalolagi. Ua toe faaleleia foi le vaega mo pepe fananau i maota gasegase faaitumalo i Lufilufi ma Fusi, ma na mae'a i le 2007 le fausia o se nofoaga mo tausima'i i Foalalo i se fesoasoani mai le Iuni a Malo Europa.
4. Ua faamalosi foi le una'ia o le puipuiga ma le faalauiloina o le soifua maloloina, i ni polokalame aoao tetele a le vaega atoa. O isi polokalame o loo galulue faatasi ai le vaega a le soifua maloloina ma le mamalu o le atunuu, e aofia ai polokalame o togalaau aina, ma le polokalame faamalosi tino, lea o loo aofia ai komiti a tina, autalavou ma le lautele o le atunuu.

### **(iv) Faatoaga**

O atina'e iloga nei i le vaega o faatoaga i le lima tausaga ua tuana'i:

1. O loo tulaga lelei pea le polokalame o le "Talo Mua", ma ua avea ma se faamanatu taua mo tatou tagata, ina ia faataua faa'ele'eleaga mai o tatou lava laufanua, auā e mafai ona tatou tua iai i taimi o faigata. Ua amata nei se polokalame mo le toe lalagaina o le totoina o le Niu, koko ma le kofe, ma o loo faaaauaina pea le faaaogaina o le masini faapitoa mo fualaaui aina, mo le siitia o oloa auina atu i fafo.
2. O loo faaaauau pea galuega i auala e faaleleia atili ai le tulaga o faigafaiva, e aofia ai le toe faaaauau o le polokalame o faigafaiva i nuu ma afioaga, faapea ai ma le faatinoga o le taiala mo le pulea ma le atina'ega o le 'Tuna'. O le aso 1 o Iulai 2008 na amata faaitiitia ai tiute i luga o oloa tau-faigafaiva e faaofi mai i le atunuu, e saga una'ia ai le atina'ega o mea tau faigafaiva. Ua tulaga manuia foi sailiga o maketi i Niu Sila ma le Iuni o Malo Europa, mo le faatau atu iai o a tatou i'a.

## **(v) Atina'e Tetele**

O atina'e tetele nei na mafai ona faatinoina i le lima tausaga ua tuana'i:

### **1) Fela'ua'iga i le Laueleele**

- O le tausaga na te'a nei, na faatino ai le suiga o le itu auala e femalaga'i ai lo tatou atunuu. E ui ina tele faitioga i lenei taumafaiga, ae ua amata ona vaaia faamanuiaga, e pei ona silamiō ai le lalolagi atoa, ao ala le mafua i le faatinoga o lenei faamoemoe.
- Ua faatuina foi le Pulega mo Fela'ua'iga i le Laueleele, latou te tuufaatasia fuafuaga ma tulafono faatonutonu mo fela'ua'iga uma i luga o le laueleele. O loo faaauau pea galuega toe faaleleia i auala e agai atu i le malae vaalele, faatasi ai ma le toe faalauteteleina o auala, ma auala simā ma ala savali i autafā-ala. Ua toe nei foi o se aga ona fama'e'aina lea o le galuega tele o le faalauteteleina o le auala mai Vaitele, e faafaigofie ai le femalaga'i a o tatou tagata.
- Ina ua mae'a le tsunami, na agai le toatele o le atunuu na aafia i fanua-ā-uta. Ma o le silasila a le Malo, e tatau ona fausia ni auala lelei mo le saogalemu o i latou nei, ma ua amata nei se polokalame e fausia uma ai auala galue mo nuu nei na aafia.
- E le gata la i le fausia o auala, ae tatau foi ona faamautinoa, e malu puipuia nei auala mai nisi aafiaga faalenatura. O le ala lea o le fausia o taligalu, e pei ona iai le polokalame o loo faagasolo pea, o loo fausia ai taligalu ile tele o afioaga mo le puipuiga o nei aseta a le Malo, ae faapea foi le soifua o le mamalu o le atunuu.

### **2) Suavai ma Vai Lafoa'i**

Ua amataina nei le faamalositia o le pulea lelei o le suavai, e pei ona maioio mai i fuafuaga ua ta'ua, "Suavai mo le Ola". O loo taulāmua nei matagaluega o le Soifua Maloloina ma le Suavai i le faatinoga o le polokalame faapitoa mo le Suavai, ae maise ai o le "faaleleia o le pulea o suavai lafoa'i". O isi atina'e e aofia ai vaega nei:

- Ua amata su'esu'ega i nofoaga o loo pu'e ai le suavai taumafa, i ni aafiaga mai suavai lafoa'i
- Ua amata nei le faaleleia o vai lafoai ma vai fetafea'i mo i latou o loo fesoota'i ma le Pulega o Suavai, ma e fuafua e faamae'a i le tausaga nei.
- Ua faatino nei se polokalame i vai lafoa'i mo aoga ma maota gasegase. E selau sefulu ma le iva aoga tulaga lua o loo aofia ai, faatasi ai ma maota gasegase faaitumalo e tolu.

- E sefulu ma le tolu aoga tulaga lua i le itumalo o Aleipata, ua mae'a fausia a latou fale-ui. O le polokalame lenei e aofia ai le fale atoa ma totoga, o tane e faaalu iai otaota lafoa'i, faatasi ai ma tane vai ina ia mautinoa e mau pea le suavai.

### 3) *Eletise*

O atina'e nei mo le eletise na mafai ona faatino:

- Ua mafai nei ona ola faasolo-atoa le eletise i Apolima tai, i se faiga e faaoga ai le malosiaga mai le la.
- Ua mae'a nei ona toe faaleleia le auaunaga tau eletise i afioaga na aafia i le tsunami, ma ua amata foi le auina atu o le eletise i nofoaga fou ua faamautu iai i latou na aafia.
- O loo taoto nei i le palemene se tulafono ua mae'a ona tapena, e tatala ai le gaosia o le eletise, faatsi ai ma le faatuina o se Pulega Faatonutonu mo mataupu tau Eletise ma le Suavai.

### 4) *Fesoota'iga*

O atina'e nei tau faamatalaga, fesootaiga ma auaunaga faatekonolosi:

- O le 2006 na faatuina ai le ofisa mo le Pulega Faatonutonu mo mataupu tau fesoota'iga. O ana matafaioi, e aofia ai le una'ia o tauvaga faapisinisi, a ia aua nei pagatia ai le atunuu mai le soona sii maualuga o tau o auaunaga.
- O le tausaga lava foi lea na ofi mai ai le kamupani fai-telefoni feavea'i o le Digicel, ma ua avea ma itu ua faaleleia ai le auaunaga mo tagata fai telefoni.
- O le 2008 na tuu ese'eseina ai le Samoatel ma le Ofisa o Falemeli, ma ua iai le fuafuaga e faamae'a le faatumaoti ina o le Samoatel a o lei mae'a le tausaga nei.
- Ua siitia fesootaiga ma atunuu i fafo, ina ua mae'a ona fausia le laina-fesootai i lalo o le sami, mai Amerika Samoa i Hawaii.

### 5) *Uafu ma Taulaga*

O atina'e o uafu ma taulaga ma felauaiga i le sami, e aofia ai mea nei:

- O Tesema 2008 na mae'a ai le Uafu i Aleipata. Ae na faaleagaina lenei uafu i le tsunami, ma ua mae'a nei galuega toe faaleleia, ma ua mafai nei ona toe faaoga lenei uafu.
- Ua siitia nei le auaunaga i le va o Upolu ma Savaii, ina ua tuutaula le vaa fou o le Lady Samoa III i le amataga o le tausaga nei. O lenei vaa o se mealofa mai le

Malo Iapani, ma ua amata nei ana malaga ma lana auaunaga mo le mamalu o le atunuu.

#### **6) *Malae Vaalele***

O atina'e nei o malae vaalele, na mafai ona faatino:

- Ua faatu nei se lala o le Ofisa o le Vaai Tau i le malae vaalele i Faleolo
- O le tausaga na te'a nei, na toe tatalaina ai le malae vaalele i Fagalii, mo le faafaigofie o femalagaiga i Amerika Samoa, ae maise ai o le siitia ai o numera o tagata tafafao mai i si o tatou atunuu.
- Ua siitia foi tulaga tau saogalemu i malae vaalele, ina ua faavaeina le Pulega o Fuiimū ma Faalavelave Faafuase'i i le 2007, lea e tālia le taunuu mai o a latou taavale fuiimū fou mai Iapani, Ausetalia ma Siamani.

#### **(vi) *Atina'e o Turisi***

1. O le faagasologa mai le lima tausaga ua tuana'i, o loo tumau ai pea le avea o le turisi ma atina'e e aupito tele tupe maua mai fafo e maua mai ai, lea e aofia ai le \$204 miliona i le 2005, \$236 miliona i le 2006, \$263 miliona i le 2007, \$288 miliona i le 2008 ma le \$304 miliona i le 2009. Na vaaia foi le siitia ai o turisi tafafao mai fafo, i le 11.6 pasene i tausaga taitasi talu mai le 2005.
2. Na avea foi le faatinoina o le polokalame mo le tuusaunoaina o tiute ma itu na una'ia ai le faatupula'ia o fale talimalo i tausaga ua tuana'i, lea e tele lava ina faamanuiaina ai le au fai fale talimalo.
3. E iva fale talimalo fou ua faatutū talu mai le 2005. O nei fale tali malo e aofia ai le Tanoa Tusitala, Le Alaimoana Hotel, Le Manumea Hotel, Le Vasa Resort, Jetover Motel, Le Lagoto Resort, Siufaga Beach Resort, Seabreeze Resort, ma le Green Ridge Motel. E le gata i lea, e lua isi fale talimalo tetele o loo faatalanoaina i le taimi nei, mo le fausia i se taimi lata mai.
4. O le amataga o le tausaga nei na amata faatino ai le faamamaluina o Tapulaa Moomia mo fale talimalo uma i totonu o le atunuu. O le manu lautī o lenei taumafaiga, ina ia o gatasi polokalame faalauiloa a fale talimalo ma auaunaga latou te gafatia, ina ia faamalieina ai le tagata tafafao mai i auaunaga ma measina a Samoa.
5. Ua faavaeina foi mataupu tau turisi e aoaoina i aoga, i se taumafaiga soofaatasi a le SQA, NUS, APTC ma le mamalu o le au fai atina'e turisi, ina ia mautinoa e o gatusa mataupu e aoaoina ai fanau, ma manaoga o loo moomia mo lenei atina'e.



## **(vii) Atina'e o Pisinisi**

Ua tele lava ina faaleleia fuafuaga moomia mo le una'ia o pisinisi i totonu o le atunuu, e ala i le toe fetuunaiga o le tele o tulafono, e aofia ai le tulafono toe teuteu mo kamupani 2006, lea ua faigofie ai i pisinisi ona resitara a latou atina'e.

### **1) Atina'ega o le Vaega o Tupe**

- O le 2008 na faavaeina ai le faaputuga-tupe ua ta'ua o le PSSF, e fesoasoani ai i le atina'ega o pisinisi laiti ma pisinisi feoloolo. Na iloga le tāua o lenei faaputuga-tupe, i le tula'i mai ai o le tsunami i le tausaga na te'a nei. Ma o le auala lea na faaoga e faasoa atu ai fesoasoani i pisinisi na aafia i le galu lolo.
- E tele pisinisi laiti sa latou faaogaina ma o loo faaogaina pea le auunaga a le "Ofisa mo Atina'e Laiti" poo le SBEC, mo fautuaga ma aoga i auala e atina'e ai pisinisi laiti.

### **2) Fefaataua'iga**

- O le aso 1 Iulai 2008 na amata faamamaluina ai le Tulafono Toe Teuteu mo Tiute 2008, lea na aveesea ai le tele o tiute mai oloa faapitoa mai le tele o pisinisi.
- O le aso 1 foi o Ianuari 2008 na faaititia ai tiute faapitoa i oloa mai fafo, e faamamalu ai le maliega tau fefaataua'iga i le va o Samoa ma isi atunuu o le Pasefika, poo le PICTA.

## **(viii) Atina'e o Taaloga**

1. Ua mae'a nei ona faatu le Pulega mo Malae ma Fale Taalo i le Atunuu, latou te faaleleia ma faagaioia le faaogaina o malae ma fale taalo i taaloga faavaomalo, ma taaloga i totonu lava o Samoa.
2. O le 2007 na talimalo ai Samoa i taaloga a le Pasefika i Saute. Lea ua mae'a fausia malae ma fale taalo lelei, ma ua mafai foi ona faataunuina i lo tatou atunuu nisi o taaloga faavaomalo, e aofia ai Su'ega Siamupini a le lalolagi i le siisii u'amea mamafa, taamilosaga kirikiti palagi a atunuu i sasa'e o le pasefika, su'ega siamupini o faipelega a le Oceania, taamilosaga faaali-tino a le Oceania, ma le Ipu o le Lalolagi i le Judo mo le Oceania, lea na faataunuina i le tausaga na te'a nei.
3. O le tausaga foi na te'a nei, na faalauiloa mai ai e le Komiti Faatonu Faavaomalo a le Judo i le lalolagi, le faia ai o le faaiuga ina ia fausia i Samoa nei le "*Oceania Olympic Judo Training Centre*", po o le nofoaga tutotonu mo le atina'ega o le Judo i lenei itulagi.

Lau afioga i le Fofoga Fetalai ma le mamalu o le maota,  
O nisi nā o atina'e na ausia i le lima tausaga ua tuana'i ua mafai ona ou otooto atu. Ua atagia ai le alualu i luma o le atina'e o le tamaoaiga o Samoa. Ae talitonu le manatu, na mafai ona faataunuaina ma ausia nei atina'e, ona o le galulue faatasi o itutino uma o le tatou atunuu, e amata mai lava i ta'ita'i o ekalesia, ta'ita'i o nuu ma afioaga, le vaega tumaoti faatasi ai ma le tatou Malo.

Ae peitai, e lē tatau ona tatou se'etia i le malū o le tai taeao, ona o le tele o nei atina'e ua ausia. O lea ua faato'a o'oo'o mai aafiaga o le faaletonu o le tamaoaiga o le lalolagi, ae ua tatou vaaia foi le tulaga ma'ale'ale o si o tatou atunuu mai aafiaga faale-natura. O le mea lea e taua ai lava le tatou ola māgafagafa, ma tausiona pea le tuuina atu o auunaga moomia, faatasi ai ma le faia o ni auala e toe lalaga ai le atina'ega o le tatou tamaoaiga.

### **III. TAIALA O LE TALA O LE TUPE**

Lau afioga i le Fofoga Fetalai ma le mamalu o le Maota

O le a faaauau pea ona siitia tupe faaalu mo le 2010/11, ina ia una'ia ai le toe faatupula'ia o le tamaoaiga talu mai le faaletonu o le tamaoaiga o le lalolagi, faapea ai le una'ia o atina'e tetele ua faatulagaina nei. O le maualuga o tupe faaalu o le a siitia ai le faasiliga o tupe faa-alu nai lo tupe maua e tusa lea ma le 9% o le aofaiga o le tamaoaiga i le 2010/11. O lea ua iai le naunautaiga o le Malo, ina ia toe tuu-itiitia le faasiliga o tupe faa-alu nai lo tupe maua ia i lalo ifo o le 3% o le aofaiga o le tamaoaiga pe a mae'a galuega toe faaleleia o le tsunami i le tausaga e 2013.

E tele le aafiaga o le tatou atunuu mai le tsunami, ae maise lava i le vaega o tagata tafafao mai fafo, lea na faaleagaina le tele o faletalimalo i le itu i saute o Upolu. O le isi lea mafuaaga na pa'ū ai i le 1.8% le tamaoaiga i le 2009, i le mae'a ai o le isi pa'ū e 3% i le 2008, ona o le faaletonu o le tamaoaiga o le lalolagi, lea na tele ina aafia ai le vaega o oloa gaosi.

Ua fuafua e faaoga tupe faamealofa mai fafo, faatasi ai ma nonogatupe e maualalo tului e fesoasoani i le siitia o tupe maua.

E iai le talitonuga e toe siitia i le 3% le tatou tamaoaiga i le 2010/11, pe a toe solosolo lelei le faatinoga o atina'e eseese ae maise ai o atina'e tetele i totonu o le atunuu. O le a faaitiitia foi le tau o le soifuaga i le va o le 3 i le 4%. O le a faaauau le faaitiitia o tupe maua mai tagata tafafao mai fafo ona o aafiaga lava o le tsunami ma le malosi o le faatauvā mai o isi atunuu o le pasefika, ae o le a toe siitia i le faaiuga o le tausaga fou. O le toe tulaga lelei mai o tamaoaiga o Niu Sila ma Ausetalia, o le a toe siitia ai tupe faamomoli mai fafo.

## IV. OTOOTOGA O LE TALA FAATATAU O LE TUPE

Lau Afioga i le Fofoga Fetalai ma le mamalu o le Maota,

O le ootoga leni o le Tala Faatatau o le Tupe 2010/2011.

<b><u>Tupe Maua</u></b>		<b>\$596,247,276</b>
Tupe Maua Masani	\$472,400,569	
Tupe Faameaalofa mai Fafo	\$123,846,708	
<b><u>Tupe Faaalu</u></b>		<b>\$746,901,013</b>
Tupe Faaalu Faaletulafono	\$ 71,050,530	
Tupe Faaalu i Polokalame	\$437,884,666	
Tupe Faaalu i Atina'e	\$224,829,277	
Tupe Faaalu le Fuafuaina	\$ 13,136,540	
<b><u>Aotelega o Tupe Pa'u</u></b>		<b>(\$150,653,737)</b>
Faatupeina mai:		
Nonogatupe mai Fafo	\$149,081,267	
<b><u>Tupe Pa'u</u></b>		<b>(\$ 1,572,469)</b>

O le aotelega o le Tala o le Tupe o lo'o atagia mai ai e \$150.6m se faasiliga o tupe faaalu nai lo tupe maua. O le faatupeina o lea vaegatupe o le a maua mai i nonogatupe e maualalo o latou tului mai tatou paaga e tusa lea ma le \$149.1m. O le faaliliuina o le tupe pa'u i le faatulagaga o fuainumera faamauina (GFS) ua faamauina ai o le faasiliga o tupe faaalu nai lo tupe maua e tusa lea ma le 9.3% o le aofaiga o le tamaoaiga. O leni tupe pa'u o lo'o iai pea i lona tulaga gafatia ona o leni vaitau o lo'o o faatasi aafiaga o le faaletonu o le tamaoaiga o le lalolagi ma aafiaga o le tsunami. O loo iai pea le talitonuga e aga'i ina faaleleia le tulaga o le tupe i le lumanai ona o le tele lava o nei vaegatupe o loo faaagaga mo le faatupeina o atina'e tetele a le Malo.

## V. FAVAE O TUPE MAUA

O le tulai mai o le tsunami i le tausaga na te'a nei, ua faalēaogāina ai taumafaiga a le Malo ina ia vave ona toe faaleleia le tatou tamaoaiga mai aafiaga o le faaletonu o le tamaoaiga o le lalolagi. Ua le mafai ona siitia ni lafoga ona e moomia se toe una'ia o atina'e e toe faaleleia ai le tamaoaiga.

O le ala lea o lo'u fiafia e faailoa atu, o le a lē iai ni siitaga i lafoga mo le 2010/11, ona o aafiaga o lea faiga i pisinisi ma le mamalu o le atunuu.

Ae o le a talosagaina ni tupe faamealofa faatasi ai ma ni nonōgatupe e maualalo le tului, e faatupe ai a tatou atina'e tetele.

O le aofa'i o tupe maua masani o loo fuafua mo le 2010/11 e \$472.4m. O lenei aofa'i ua 18.4% ua siitia ai nai lo le tausaga nei.

## **VI. ATINA'E FAAMUAMUA**

O le aofa'iga o tupe faaagaga mo atina'e mo le tausaga fou, e **\$746.9 miliona**. E 0.8% ua sili atu ai lenei aofa'i nai lo le aofai o le tausaga nei, pe a ave ese ai le \$70 miliona na faaopoopo iai mo galuega toe faaleleia o le tsunami. E ui lava i aafiaga ogaoga o loo feagai ai ma le atunuu, ae o le a faaauau pea ona lagolagoina e le Malo vaega faamuamua o loo i le Taiala mo le Atina'e o Samoa, 2008 – 2012.

Lau afioga i le Fofoga Fetalai,

O le a ou taumafai loa e ootoo atu vaega autū o le a ave iai le faamuamua a le Malo mo le 2010/11.

### **1. POLOKALAME FOU**

#### ***(i) Fetuuna'iga ma le Siitaga o Totogi.***

O le taimi mulimuli na faatino ai se siitaga o totogi, o le 2006. Ae talu mai lea tausaga, ua tele faafitauli ua fetaia'i ma Samoa, e aofia ai le siita'i o le tau o taumafa ma le tamaoiga o le lalolagi. O nei faaletonu, na pagatia ai o tatou tagata ona o le siitia o le tau o oloa. A o le aafia ai o Samoa i le tsunami, ua toe faaopoopo mai ai isi faigata, auā e le gata ina maumau ai soifua, ae faapea foi le tele o mea na faaleagaina ai. O mafuaaga ia, ua manatu ai le Malo, ua tatau ma talafeagai ona faia se fetuuna'iga ma se siitaga o totogi, a ia faatino i se tulaga e lē aafia ai le aufai pisinisi, a ia tele se faamanuiaga e maua e i latou o loo i totogi maualalo.

O lenei fetuuna'iga, e tusa ma le 9.7% le faamanuiaga e maua e i latou o loo ile tulaga o le Principal agai i lalo. O isi e aofia ai Ofisa Sili Lagolago ma luga atu, o le a siitia i le 2% e tuu mamaina ai le tau o le soifuaga. Ma o lenei siitaga, o le a faamamaluina i le aso 1 Iulai 2010.

Ua mae'a foi ona iloiloaina talosaga mai matagaluega o Aoga ma Leoleo, mo le toe fetuuna'iga o totogi mo alii ma tamaitai Faiaoga, faapea alii ma tamaitai Leoleo. O nei fetuuna'iga, o loo fua i le umi o le auaunaga, agavaa atoa ai ma fe'ese'ese'iga i le va o tulaga faigaluega.

O le fetuuna'iga o tofogi mo alii ma tamaitai Tausi Soifua o loo iloiloaina i le taimi nei, ma o le ā faatino lea fetuuna'iga pe a mae'a le iloiloga o loo faia. Sa iai le agaga maualuga e faatino faatasi uma nei fetuuna'iga, ae peita'i, ua utiuti le taimi e iloilo ai le talosaga a Tausi Soifua ona o nisi o mataupu ma'ale'ale e ao ona lauliliu iai le tofā, a o le'i faia iai se faai'uga maumau tutū. Ma o le a faatino lenei fetuunaiga o tofogi pe maea le iloiloga o loo faia nei.

A o tālia ai le faai'uga o lenei iloiloga, o loo maua lava faamanuiaga a Tausi Soifua mai le siitaga e 9.7% o loo fuafuaina, ona o le tele o i latou, o loo i tulaga o le Principal ma lalo ifo.

### ***(ii) Penisione a le Au Matutua***

O le a siitia i le 4% le Penisione mo Tagata Matutua i le \$130.00 i le masina. Ua sili atu le siitaga lea ma le 2% o le siitaga o loo fuafuaina nei mo e maualuluga tofogi. Ma ua atagia ai le amanaia tele e le Malo o le soifua manuia o tagata matutua.

### ***(iii) Faalauiloa Samoa i Atunuu i Fafu***

O le atina'e o tagata tafafao mai fafo, e aupito sili ona tele tupe maua mai fafo e mafai ona maua mai ai, ae o le vaega aupito sili foi lea ona pagatia i le tsunami. O le ala lea o le faatatauina o le \$2.54m mo galuega faalauiloa a Samoa i totonu o Ausetalia, sei toe faatosina mai ai tagata tafafao e toe asiasi mai i Samoa. O lenei taumafaiga, ua atagia ai le faatauina e le Malo o lenei atina'e.

### ***(iv) Fesoasoani mo le Aufai Pisinisi***

E tele se aofa'i o le a siitia ai fesoasoani mo le Aufai pisinisi ma le Ofisa mo Atina'e Laiti (SBEC). E 100% o le a siitia ai i le \$0.4m le fesoasoani i le SBEC, ae siitia le fesoasoani mo le aufai pisinisi mai le \$0.04m i le tausaga nei, i le \$0.10m mo le tausaga fou. O lona uiga, e 150% o le a siitia ai.

## **2. VAEGA FAAMUAMUA**

### **(i) Aoaoga**

O loo faaaauu pea le faatauina o lenei vaega, ma e \$85.42m e tuuina atu mo galuega faatino a lenei vaega o aoaoga, ma e tusa ma le 25% pe a fua i le tausaga faaletupe 2009/10 e le aofia ai vaegatupe mo galuega faaleleia mo le sunami. O atina'e nei o le a faatatauina ai lenei Seleni:

- \$47.3m mo le matagaluega o Aoaoga, Taaloga ma Aganuu.
- \$5.0m mo aoga a ekalesia ma aoga tumaoti.

- \$1.65m mo le Pulega o Faailopga ma Tusi Pasi Taualoa (SQA)
- \$11.42m mo le Iunivesite Aoao o Samoa (NUS)
- \$2.40m ua faaagaga mo tusi ma api mo aoga i nuu i tua
- \$1.41m mo pili o i latou o loo aoaoina faa-faiaoga i le NUS.
- \$5.60m mo pili o le fanau aoga i se faiga tuufaatasi ma Niu Sila ma Ausetalia.
- \$0.14m e faatupe ai le amataga o aoaoga faa-kerisiano i totonu o aoga.
- \$3.0m mo galuega faaleleia o le tsunami

## **(ii) Soifua Maloloina**

O le isi lea vaega o loo ave pea iai le faataua. O lea ua siitia ai foi lana tupe faaagaga mo le tausaga fou i le \$64.89m. O se siitaga e 10% mai le \$59.0m i le tausaga nei. O atina'e nei o le a ave iai le faamuamua:

- \$5.3m mo le Matagaluega o le Soifua Maloloina.
- \$54.13 mo le Pulega o Auaunaga Faale-Soifua Maloloina, 10% ua siitia ai mai le tausaga nei.
- \$4.52m mo le Faalapotopotoga mo Gasegase Faamamā Toto.
- \$0.02m mo le Asosi mo le Ma'i Suka i Samoa.
- \$0.10m e lagoalgo ai le Iunivesite Faa-foma'i o le Pasefika (OUM).
- \$9.3m mo gasegase auina atu i fafo, lea ua siitia i le \$1.3m pe a fua i le 2009/10.

## **(iii) Faatoaga**

E \$12.33m le aofa'i o tupe faatatauina mo faatoaga i le tausaga fou, lea e 9% ua siitia ai mai le tausaga nei, ae le o aofia ai galuega faaleleia o le tsunami. O atina'e nei o le a ave iai le faamuamua, ina ia toe lalaga mai ai lenei vaega taua:

- \$0.15m mo le polokalame e toe lalaga ai le totona ole niu, koko ma le kofe.
- \$0.30m mo le polokalame o le Talo Mua.

## **(iv) Atina'e Tetele**

### **a) Eletise**

E \$9.76m o le a faaagaga mo atina'e o le eletise. O le \$3.17m o lenei aofa'i o le a faatino ai galuega mo tagata lautele (poo CSOs), a o le isi \$6.59m e fesoasoani ai i le lafoga totogi mo suauu.

E \$5.0m o le a faaopoopo iai mo galuega toe faaleleia o le tsunami.

**e) *Suavai ma Vai Lafoa'i***

E \$8.91m ua faaagaga mo le Pulega o le Suavai, mo galuega e mautinoa ai le maua e tagata uma o suavai mamā. O le \$3.41m o lea aofa'i o le a faaoga e le Pulega e faatino ai galuega mo tagata lautele (CSO).

E \$5.49m se tupe faaopoopo o le a tuuina atu i le Pulega, e tauala mai i se fesoasoani mai le Iuni o Malo Europa, e faatino ai galuega ua fuafuaina i le "Taiala mo Galuega Tau Suavai". E ese mai ia Seleni le \$1.43m o loo i lalo o le Matagaluega a Tamaitai, ma le Atina'e o Afioaga ma Aga Fesoota'i, e faaleleia ai suavai taumafa a afioaga taitasi, faatasi ai ma le \$2.0m o loo i lalo o le LTA, e faalautele ai le alavai i Mulivai, mo le tuu itiitia o le lolovaia i taimi o timuga. O le a iai foi tupe faaagaga mo le pulea lelei o suavai ma vai lafoa'i.

**i) *Auala ma Ala-simā***

O le a faaauau pea le polokalame a le Malo mo le fausia o auala ma ala-simā, i lalo o le Pulega o Fela'ua'iga i le Fogaele'ele (LTA) ma le vaavaaiga a le Matagaluega o Galuega ma Atina'e Tetele (MWTI).

E \$40.95m le tupe faaagaga mo le LTA, ma e \$14.90m o lea aofa'i o le a fausia ai galuega fou, ae \$13.06m o le a faaagaga mo le faaleleia o auala o loo iai nei.

**o) *Vaalele***

E \$1.0m se tupe faaagaga o le a fai ma fesoasoani a le Malo i le kamupani vaalele a le polenisia.

**u) *Fesoota'iga***

E \$4.16m o le a tuuina atu e faagaioi ai le Matagaluega o Fesootaiga, Faamatalaga ma Tomai Faa-tekonolosi

**f) *Tagata Tafafao mai Fafao***

O le isi lenei vaega taua o le a ave iai le faamuamua a le Malo, e ala i atina'e nei:

- E \$10.22m ua faaagaga mo le Pulega o Tagata Tafafao mai Fafao (STA), ma e 34% ua siitia ai mai le tausaga nei. E \$2.54m o lea aofa'i o le a faaogaina e faalauiloa ai Samoa i Ausetalia.
- \$0.15m mo le faaaliga tele o loo faia i Shanghai, Saina.
- \$0.50m e fai ma sao o le tatou Malo mo le faaauauina o malaga a le Air NZ.

**(v) *Atina'e o Pisinisi***

O vaega nei o le a tauala atu ai se fesoasoani a le malo mo pisinisi laiti:

- \$0.40m le fesoasoani mo galuega a le Ofisa Mo Atina'e Laiti (SBEC)

- Siitia mai le \$0.04m o loo iai i le tausaga nei, i le \$0.10m mo le tausaga fou le feosasoani mo le atina'e o le Vaega Tumaoti, e faailoa ai le lagolago a le Malo mo lea vaega.

#### **(vi) Taaloga**

E tumau pea le naunauta'iga o le Malo ina ia atina'e itu tau taaloga i le atunuu, e ala lea i lona lagolagoina o Tauvaga tetele faavaomalo e faia mai iinei. O vaega ia o le a faaagaga iai le Seleni mo lenei tausaga:

- \$0.50m e talimalo ai Samoa i le Su'ega Siamupini o le Judo, lea o le a faa-lua ona faia mai i Samoa i le faaiuga o le tausaga nei.
- \$0.15m mo le au a Samoa mo Taaloga a le Taupulega a Peretania, e faia i Initia.
- \$0.10m e lagolago ai taaloga a i latou e iai manaoga faapitoa
- \$0.35m e tuuina atu i le Iuni Lakapi a Samoa (SRU) e atina'e ai le taaloga o le lakapi.

O le a tuuina atu foi e le Malo faamanuiaga e tuusaunoa ai lafoga mo pisinisi uma e lagolagoina soo se taaloga e ala i mealofa tupe. E iai aiaiga o lenei faamanuiaga, ae iai le manatu o le a avea lea ma tulaga e galulue faatasi ai itu-tino eseese e tosina mai ai Tauvaga tetele faavaomalo i le tatou atunuu.

### **VII. TUPE FAAALU LĒ FUAFUAINA**

E \$13.14m ua faaagaga mo Vaega Tupe faaalu lē fuafuaina mo le tausaga fou.

### **VIII. TALA OLE TUPE FAAOPOPO LONA LUA 2009/2010**

Ua tuuina atu faatasi lenei Tala Faatatau Autu o le Tupe 2010/2011, ma le Tala Faatatau Faaopopo Lona Lua o le Tupe 2009/2010. O le faatulagaga o lenei Tala Faatatau Faaopopo Lona Lua o lo'o iai le \$5.2m o tupe faaalu faaopopo. O le aotelega o lenei tupe faaalu faaopopo e faatupe mai tupe maua faaopopo e \$5.7m ma le \$0.69m e faatupeina mai tupe faasao o le tausaga faaletupe o lo'o faagasolo nei. I le tu'ufaatasia ai o lenei Tala Faaopopo Lona Lua ma le Tala Faatatau Autu o le Tupe 2009/2010 e aofia ai le Tala Faatatau Faaopopo Muamua o Tupe, o lo'o atagia mai ai le si'itia o tupe faasili mai le \$0.22m i le \$1.34m i le faaiuga o le tausaga faaletupe 2009/2010.

### **.IX. FUAFUAGA TU'UTU'U MAMAO**

Lau Afioga i le Fofoga Fetalai,

O Faamatalaga o Tupe Faaalu Tuutuu Mamao o le Tala o le Tupe i le tausaga ua mavae sa fausia e fua i le tulaga le mautonu o le tamaoaiga o le lalolagi ma o lo'o iai pea le popolega i le tulaga mafatia o lo'o iai le tamaoaiga aemaise ai o fetu'una'iga o le Tala o le Tupe a le Malo ona o le faalavelave faalenatura lea sa aafia ai si o tatou atunuu.



E le alofia lava le maoa'e o le aafiaga o le tsunami i fuafuaga tuutuu mamao a le Malo mo leisi tolu tausaga ona o le fesuiaiga o faiga faavae, ia mautinoa ai e faatino le fesoasoani lavea'i a le Malo, faatasi ai ma a tatou paaga mai fafo i le toe faaleleia o vaega o le atunuu sa faaleagaina e aunoa ma le aafia o taumafaiga a le Malo ina ia mausali pea le tamaoaiga.

O Faamatalaga o Tupe Faaalu Tuutuu Mamao o le Tala o le Tupe i le tolu tausaga o lumanai o lo'o atagia mai ai le faatupulaia pea o nonogatupe a le Malo aemaise o le faaitiitia foi lea o le tuuaofai o meatotino. Ona o lea tulaga o le a matua faamalositia taumafaiga ina ia pulea lelei tupe faaalu ma tupe maua e fua i le fetu'unaiga o faiga faavae e faaauau ai pea le faatupeina o le polokalame mo le faaleleia o nuu ma afioaga na aafia i le tsunami aemaise o le toe una'ia o le tamaoaiga e auala lea i le faaitiitia o tupe alu a le Malo ona o le si'itia o le auauunaga.

## **X. AUIVI MO FUA FAATATAU O GALUEGA FAATINO**

Lau afioga i le Fofoga Fetalai ma le mamalu o le Maota

I le amataga o le 2009 na amata faatinoina ai e le Malo le Fuafuaga mo le Faaleleia o Tulaga Tau Tupe. O lenei fuafuaga e faamoemoe o le a si'itia ai le tulaga o lo'o iai le puleaina o tulaga tau tupe. O se tasi o sini autu o lenei Fuafuaga o le taumafai lea e faaleleia le feso'otaiga o galuega faatino ma alafua i totonu o le Tala o le Tupe a le Malo ina ia maioio alafua e fua ai taunuuga o galuega o lo'o faatino e tusa ai ma le Taiala mo le Atinae o Samoa 2008-2012.

O lenei auivi fou o le a faaaogaina e sui ai vaega o lo'o faamanino mai ai galuega faatino a matagaluega o lo'o lipotia i totonu o le Tala Autu o le Tupe. O le tausaga muamua lenei o le a faata'ita'i ai lenei faiga fou e faaoga iai matagaluega e valu (8) e aofia ai le Matagaluega o Soifua Maloloina, Matagaluega o Aoga, Taaloga ma Aganuu, Matagaluega o Punaoa Faalenatura ma Siosiomaga, Matagaluega o Tina, Tamaita'i ma Agafesootai, Matagaluega o Faamasinoga, Matagaluega o Leoleo ma Falepuipui, Komisi o Galuega a le Malo ma le Ofisa o le Loia Sili. E faamoemoe o le a faasolosolo pea le faaaogaina e matagaluega o lenei faiga fou i le lumanai e faaoga iai lesona e maua mai i matagaluega o le a faata'ita'iina muamua lenei suiga.

## **XI. UPU FAAI'U**

E pei ona ou ta'ua muamua, e le i faatauagavale le faiga-Malo lenei i le faatautaia o le tamaoaiga i le lima tausaga ua tuana'i. E faamaonia lea i le tulaga lelei o le tamaoaiga sa iai a o lei oo mai aafiaga o le faaletonu i le tamaoaiga o le lalolagi i le 2008, faapea ai ma le galu lolo i le tausaga na te'a nei.

A tuu atu i le itu o le soifuaga lautele, ua sili atu le tulaga o le soifua maloloina ma aoaoga i le taimi nei, nai lo le lima tausaga ua mavae. O loo faaauau foi le faaleleia o atina'e tetele e lagolago ai le atinae o pisinisi ma le soifuaga o tagata lautele.

Ua faamanatu mai e nei to'atuga na feagai ma le tatou atunuu, o loo ma'ale'ale pea le siosiomaga o loo tatou ola ma soifua ai.

O nei itu uma ua saga faamausalī ai le talitonuga a le Malo ile taiāla o loo faavae ai le tala o le tupe lenei mo le 2010/11, o se ta'iala lelei ma talafeagai e toe fatufatu ai lo tatou tamaoaiga i le tausaga fou, mā faafitauli sa feagai ai.

E ui lava la i le siitia o tupe faaalu i le tala o le tupe, e leai se manatu o le Malo e siita'i lafoga e faatupe ai le atina'e. A ua au-sulusulu lava e tāpā fesoasoani mā fafo, faapea ai ma nonoga tupe e maualalo tului e toomaga iai i taimi faigata faapenei.

E le gata i lea, ae talitonu foi le Malo, o le toe fetuuna'iga o totoi ma le siitaga lautele o totoi mo tagata faigaleuaga a le Malo, o se fuafuaga talafeagai lelei mo lenei taimi. Auā ua vae-seugā o faa-ao gagase lo tatou atunuu ma faaletonu o le lalolagi, ae toe sosoo mā ma le tsunami. Ma ua manatu ai, ua talafeagai lelei le taimi e faatino ai lenei siitaga.

O le siitaga foi lenei, na fetuuna'i ma le faaeteete, ina ia faaitiitia ai ni aafiaga i le aufai pisinisi. Ma o le ala lea o le pa'u o le momoga o lenei siitaga i ai latou e maualalo totoi. O le agaga lava foi lea e tasi i le siitaga o le penisione mo le au matutua, ina ia maua se fesoasoani e avagalima a'i i latou i mea e moomia mo le soifuaga.

Lau afioga i le Fofoga Fetalai ma le mamalu o le Fono,

O le a faaauau pea e le Malo ona faatino faiga faavae talafeagai e atina'e ai lo tatou tamaoaiga, mo le soifua manuia o tagata uma. O le auala mo le agai atu i luma, e tumu i fitā ma faigatā, e pei ona tatou molimauina. Ae o le a faamoemoe tele lou Malo i le lagolago a le atunuu atoa. Tatou galulue faatasi, e ati a'e lo tatou tamaoaiga.

Tatou mulumulu au-foe, ma faaoga tatau mealofa a le Atua ua foa'i mā, tatou te manumalo ai i taimi o tofotofoga, ma taimi o faigata. Tatou tatalo ma galulue, ma faamoemoe i le Atua, e manuia ai a tatou taumafaiga uma.

Lau afioga i le Fofoga Fetalai

Ou te tuuina atu aloa'ia lenei Tala Faatatau Autu o le Tupe 2010/11 i le Laulauāfono a le Palemene.

Ia faamanuia le Atua ia Samoa ma ona tagata.

Soifua